



110



度支奏議

雲南司  
卷之十三



度支奏議目錄

雲南司十三卷

覆蘓松撫按查叅同知王德純疏

覆總漕題留輕賚銀兩修船疏

題節年漕折輕賚積逋未完疏

覆王漕院條議漕規四款疏

覆監兌吳澧朴責運弁張應斗疏

題漕糧積欠追比續完數目疏

覆南京兵部直陳運規定制疏

再題酌議漕糧銷筭抵欠規則疏

覆總漕鹽城水災漕糧半折疏

再覆輕賫羨餘分給淮庫修船疏

覆總督倉場題運弁給銀一槩稽留疏

覆通廳劉夢桂開壩工程免議疏

覆戶科摘叅運弁侵糧數多違限不追疏

度支奏議卷之十三

太子太保戶部尚書潘青畢自嚴視草

覆蘇松撫按查叅同知王德純疏

題爲漕折隨運並進經徵玩愒未完特疏糾叅以

肅漕規以澈情竅事雲南清吏司案呈四月二

十五日奉本部送戶科抄出巡撫應天右副都

御史曹文衡會同巡按御史饒京題前事內稱

漕糧漕折總屬一體漕運旣已輓弛爲張咸切

急公之義漕折自應如期集事共抒體

國之猷臣于去歲開徵時催本色卽催折色並此  
霆鞭於正月開幫時儻起運卽儻起解幾于舌  
敝乃有情悞不前如署嘉定縣事同知王德純  
者奉期會之令充耳如廢任催科之責袖手相  
祝只今闔屬漕米盡將抵灣該縣漕折尚未完  
解倘歲歲相尋泄泄從事不幾隳漕規而誤軍  
國乎當閭左有秋之慶猶然供億弗完是爲理劇  
無才當

國賦孔棘之時甘於徵發獨後是爲奉公忘念所  
宜責其戴罪督催俟完日議處者也等因具題  
四月二十一日奉

聖旨王德純玩悞漕折着戴罪督催完日議奪錢糧  
嚴禁那支已有屢旨着該部條飭具覆欽此欽遵  
抄出到部送司隨將那支錢糧條議具覆外其  
王德純玩悞漕折當卽呈堂咨行應天撫按勒  
令本官戴罪速行督徵俟完日議奪去後今奉  
本部送准應天巡撫莊祖誨咨前事內稱據蘇  
松兵備副使將英呈據蘇州府申准嘉定縣署

印同知王德純關稱上年十二月委署嘉定縣  
印務于二十二日到縣受事查得本縣漕折銀  
兩額該七萬三千九百三兩零謝知縣任內差  
解戶陳明解過銀四萬五千兩到府已委縣丞  
朱家臣領解訖餘二萬八千九百三兩零因借  
放元二兩年分京邊等項未完職極力徵比完  
解間又蒙撫漕二院憲牌催給漕船官軍月糧  
停舟待濟急更倍于漕折吳淞兵餉挾帆以求  
勢更迫於庚呼兩項不下萬五千金既恐運期  
違悞又恐誹兵鼓譟干係匪輕只得解放其漕  
折銀二三月內又解過二萬二千一百兩止未  
完銀六千八百三兩零乃蒙撫部會題奉

旨着職戴罪督催完日議奪已徼

寬與隨于五月中照數解府今委縣丞姚允達領解  
訖不得不一聲鳴轉詳開釋等因准此隨該本  
府知府史應選轉申漕折業已十分全完相應  
轉呈伏乞特賜轉請咨部准與開釋等因到道  
該道轉申到院據此該本院看得漕折一項係

隨糧徵解急需豈容遲欠乃蘇州府同知王德純代庖嘉邑迫於措給兵餉以致漕銀完不及額其何追于

功令自奉

明旨戴罪督催之後卽殫力設法徵完差官解訖計算前後起解銀數已屬全完無欠則本官原蒙戴罪似應開釋以昭勸懲相應咨請煩爲查照議奪施行又奉本部送准都察院咨據巡按直隸監察御史饒景呈同前事內稱漕折錢糧查

果無欠同知王德純卽應開釋等因到部送司查得先該巡漕御史王邦柱題爲舉劾有司官員等事內叅同知王德純署管嘉定縣印務該縣漕銀臣差役守催業已報完解府孰意那移借用仍未解銀一萬一千有奇臣嚴加督責於四月十二日方始全完此一臣者所當量加罰治以儆那移違誤者也緣繇具題奉

旨下部業該本部覆議本官銀雖全完法不可貸應罰俸一年奉有

欽依在案今據撫按咨會前因查係一事相應具題  
開釋案呈到部該臣等看得漕折銀兩原與漕  
糧同派隨運並進以備京軍折色之用無容延  
緩今查蘇州府同知王德純署理嘉定縣務崇  
禎三年漕折緣係壓徵倒應隔歲通完本官不  
能刻期徵解致煩應天撫按題叅奉有

明旨戴罪督催完日議奪仰見

皇上整肅漕規於充裕

國用之中仍留本官自効餘地今查該縣額銀七

萬三千九百二兩零先後解部通完無欠本官

凜承

明命拮据督催固不遺餘力矣茲據撫按合詞咨請  
開復盖念其後來之勤勞足補前日之罪戾嘉  
予維新之意也且王德純業經漕臣王邦柱亦  
以漕折題叅臣部覆擬姑念全完罰俸一年奉  
有

俞旨亦足以示創懲矣合無仰祈

聖慈准照前疏罰俸免其戴罪俾小吏咸知信賞必



度支奏議  
罰所不感奮以圖報於將來者非夫也既經撫  
按咨請前來相應題

請恭候

命下臣部行文各該衙門欽遵施行

崇禎四年閏十一月二十一日具

題十二月初四日奉

聖旨是欽此

覆總漕題留輕資銀兩修船疏

題為漕廠空匱已極料銀通負日多懇乞

聖明嚴飭速解以濟船工事雲南清吏司案呈本年  
十一月十一日奉本部送戶科抄出總漕部院  
李待問題前事內稱漕之需船也所關攸急而  
造船與修船兩項錢糧各別不容混淆向因接  
濟不敷未免通融措給歲月既久頭緒愈勞容  
歲奉

旨補造積缺年例等船工料無措該臣通查省直原

額供辦大小料銀完欠數目據清江廠工部分  
司及淮安府開造內南京各衛自天啓六年起  
至崇禎三年止共欠軍三小料銀除解過外尚  
欠三萬二千七百餘兩題奉

欽依責令應天府推官督催數催之後各衛始以江  
浙輕贖并戶部鹽引紙價抵解緣繇具詳臣思  
料銀旣以抵筭各運弁自不應解納矣乃又有  
以六升餘銀抵解者種種不明該臣批駁再四  
司府咸稱向之所開者皆照清江廠志書原載

額數而言後來京軍掣回改充運軍原不載志  
書之內故仍照當日數月開報今窮本清源極  
力搜查考之議單漕乘諸書抵解銀項兩相符  
合始得清楚則江浙輕贖爲京衛造船銀非江  
北修船銀無疑似難復索料銀于京衛矣而六  
升米銀係先江南糧米各衛修船之用餘銀解  
交淮庫添湊江北修船者當日祇知解淮衛弁  
卽認爲小料承訛襲舛愈遠而愈混其真今旣  
各歸各項以輕贖還船料而江北各衛歲該修

船一萬三千餘金內除旱脚銀二千八百八十餘兩原係修船額項再加灑帶六升餘銀多寡原無定數總計不足工費三分之一其餘原出一分羨餘每年戶部於輕賚銀內咨扣七八千兩不等自萬曆三十八年以來竟未扣發先年漕庫尚可支持又有災折暫減糧銀可以濟用今經數番搜括之後庫藏如洗近值大倉告急又無改折減存糧銀且各衛缺船節次補造灑帶漸稀扣銀日少錢糧日益不敷各衛修船將何以應事窮勢迫不得不以羨餘歸還修船也既經司道府廳先後勘明具詳前來相應具題伏乞

勅下戶部查照議單舊例將一分羨餘銀照舊歸還淮庫以濟修船之用庶錢糧得以明析運事可免坐誤矣十一月初七日奉

聖旨戶部查議具奏欽此欽遵抄出到部送司查得議單一欵萬曆八年題

准錦衣旗手上江下江四總淺船軍料旗造一百三

十一隻照舊支江浙三四輕賞銀四千六百六  
兩七錢廠造七十六隻照舊支南京戶兵二部  
鹽引柴薪銀二千七百四十八兩又一欵萬曆  
二十二年題

准解淮一分羨餘銀兩差官往返不便每年將銀數  
咨行總漕衙門於次年輕賞銀內照數扣除前  
差停止又萬曆三十九年該帶管總漕總河僉  
都御史劉士忠題議扣留輕賞一分羨餘以備  
修船之用本部覆奉

欽依照例每年於運完之日聽通糧廳銷算明  
白剩多解多剩少解少不得預扣輕賞各等因  
在案今總漕題奉前因相應議覆案呈到部該  
臣等看得漕船有關運務固稱急需但造船與  
修船原是二項今據總漕臣李待問題稱江北  
各衛修船之費歲該一萬三千餘金動支旱脚  
銀二千八百八十餘兩又灑帶六升餘銀一千  
餘兩此外以輕賞羨餘銀扣解充用議單所載  
似屬有據但查此項輕賞歲額四十萬兩自萬

曆三十八年以後或借作銅本或那造

府第或借放宗祿缺額數多先該臣部會同戶科  
題

請極力清查原議每歲於內動十萬兩抵充舊餉奉  
有

明旨今歲以米折不敷僅止撥充五萬而其餘皆儲  
爲折色之用他如沿途盤剝造船製袋及車船  
等役脚價運官完糧蠶羨等項并修理閘壩及  
邊糧貼邊諸費所需復又不貲且臣部前因每

年解庫甚少行令通廳備查歷年淮上透支甚  
多遂將此項銀兩併歸太倉收放議將每年支  
剩銀兩留爲支放各軍折色之用如本年閏十  
一月京軍折色臣部題動四萬兩作正支銷何  
一非輕賚之支用也又查崇禎三年九月內該  
臣部題覆總漕臣李待問條陳輕賚事宜一疏  
議留江北五府州縣及截扣應天一府共輕賚  
銀三萬四千五百四十四兩有奇除河工銀二  
萬六千五十餘兩專供疏濬河道之用外其船

料旱脚銀七千四百餘兩專供各衛修船之用  
又何莫非輕贖內之額銀乎兼以各省解納未  
必如數如期方在徹底查筭具題催解顧安得  
有羨餘以資淮上扣充修船之費耶况三十八  
年以後曾未扣發該衙門亦未嘗呈討或有見  
于脩船之未嘗缺耳二十餘年既可撐持值今  
國用詘乏之際乃執往例而求恐臣部不能爲無  
米之炊也是在當事諸臣多方搜括悉心調劑  
務使船工無誤

國計不匱而後可耳既經該司查議前來相應具  
題恭候

勅下臣部移文各該衙門一體欽遵施行

崇禎四年十二月十五日具

題本月十八日奉

聖旨輕贖羨餘分給淮庫脩船既稱議單所載何故  
二十年來曾未扣發又該部去年題留七千餘金  
專供各衛修船之用是否卽係此項還着明白奏  
來欽此

題節年漕折輕資積逋未完疏

題爲漕折輕齊積逋未完謹請

明旨責成撫按嚴督催解以裕

國用事雲南清吏司案呈卷查崇禎三年二月內  
該本部題爲漕銀徵解太緩累咨催取不前等  
事二十八日奉

聖旨這叅罰催徵俱依議以後漕折銀兩着與輕齊  
同入考成該部卽通飭行欽此九月內又該巡漕  
御史龔一程題前事十三日奉

聖旨漕折正額錢糧如何積歲久逋屢催未結這已完各官姑免降俸住俸未完的該部分別議處仍嚴限督解其動借銀兩着該撫按速查完補不得玩延該衙門知道欽此又該本部題爲遵

旨查明監兌司官等事九月十四日奉

聖旨這三省借用輕齋銀兩着該撫按嚴行司道依限解進違玩的部科叅處欽此十二月內又該本部題爲回

奏續完輕齋分別完欠等事二十七日奉

聖旨卿部以逋賦日多屢請重考成信功令及至行罰輒議從寬曲法徇情殊乖政體且同一罰例而欠多者反擬輕條俸遷者又得減等揆情更覺失平若去任復往守催事體果否妥便至前後更代不常完欠分數各別必須查核明白方免甲乙游移其後官代前督催者免行降革罰止住俸情法允愜還再查議明確具奏欽此呈堂行文各該撫按查核明白去後崇禎四年六月初四日奉本部送戶科抄出總漕部院李待問題爲恭報催



完崇禎三年輕齋銀兩事六月初一日奉

聖旨該部查覈具奏欽此八月十九日又奉本部送  
戶科抄出巡漕御史王邦柱題為恭報崇禎三  
年漕折全完事八月十七日奉

聖旨這解完漕折銀兩併胡順等該部查議具奏欽  
此欽遵通抄到部送司除胡順等漕折全完已  
經湖廣巡撫魏光緒于六月內具題本部覆

准開復外查漕折輕齋銀兩自天啓六年算至崇禎  
三年漕折在河南共欠二千四百八十九兩四

錢零在湖廣共欠一萬三千四百五十八兩六

錢零在南直共欠四千二百一十五兩三錢零

輕齋在江西共欠二萬七千一百七十一兩一

錢零在湖廣共欠一萬七千九百五十六兩一

錢零在南直共欠六萬三千六百二十兩零相

應題

請督催速解案呈到部該臣等看得漕折云者謂其  
易本色為折色原係兌運正額輕齋云者謂其  
以折色運本色原係隨糧派徵均當同漕糧並

至不得延緩拖欠者也向來有司玩愒成風以致積欠數多前該臣部題叅奉有

明旨切責今查叅後諸臣警心

功令漕折輕齋完納已多然尚有逋負未完者非地方之疲瘠則別項之挪移是安可遂寘不問也臣部堯底清查將漕臣所報冊籍備細磨勘自天啓六年起至崇禎三年止而漕折欠者河南等省直尚共二萬一百六十餘兩內有那借未補銀三千五百四十餘兩輕齋欠者江西等

省直尚共欠一十萬八千七百四十餘兩內有那借未補銀四萬五千二百九十餘兩臣部催解之檄不啻再四而逋者尚有如許雖多前官不了之局而接管之司實有專責乃借者不補欠者不解積玩相沿未嘗留心照管不知二項銀兩皆京軍之急需與邊方之命脉有不可須臾緩者臣部遵例查叅要亦州縣有司自取之咎而非臣部有所苛求其間也查前項欠數如寧太徐鳳等府解到銀一萬五千三百一十餘

兩並不明開州縣臣部實難混爲銷算不得不  
仍作未完仍候撫按詳開細數始可銷欠又各  
州縣欠數有已經漕臣題叅者亦有未經題叅  
者臣今按冊查算其有職名者不敢不據數詳  
註照例叅罰其無職名者因當日題叅未經詳  
開止以欠數定罰例亦不敢不據實開列再查  
職名總期分別勤惰用示勸懲已耳合無請

勅各該撫按逐年清查原叅官員曾否完解曾否陞  
轉并開經徵見任接管職名其已經陞遷者不  
責前官而責後官并那借者責成藩司該府亟  
爲查明正項措處抵補務在勒令十分全完通  
限次年二月以內據實造冊回報聽臣部再行  
叅奏倘過限不報則有查叅考成之法在臣部  
不敢少爲寬假矣謹將節年欠數臚列

上陳伏候

命下臣部行文各該衙門一體欽遵施行

崇禎四年十二月十八日具題本月二十一日奉  
聖旨據奏漕折輕齎銀兩積逋尚十餘萬內那借數

萬竟不抵解又寧太等府所解不明開州縣漕臣  
題叅亦不盡列職名顯屬玩視功令故意朦混好  
生可惡着卽嚴行該撫按逐年挨查經管各官不  
論去任接管通行詳明開寫奏奪仍一面勒限督  
催其那借的責成藩司該府未完的責成見在有  
司務如期照數盡行完解再若違誤指實叅來重  
處撫按隱庇一體並治不饒該部查叅責成亦宜  
畫一實行毋得迫時呼籲平時又多瞻徇致誤國  
計欽此

覆王漕院條議漕規四款疏

題爲歲運告成單限已復敬摠一得之愚以勸軍  
國以備

聖明採擇事雲南清吏司案呈崇禎四年九月初六  
日奉本部送戶科抄出巡漕御史王邦柱題前  
事內條議漕規四款一申明定限以速開幫夫  
漕運一役繁且鉅矣羣力之不齊渙於久媮人  
情之多玩狃于積弛今也轉弛爲張挽遲爲速  
而過淮議有定限江南二月初旬浙江二月末

旬江廣三月初旬題奉

欽依違悞叅處然過淮之遲速實因于開幫之後先  
前該臣酌議除山東河南例不過淮外其餘省  
直俱限十二月以裏盡數完兌開幫或間有零  
船找兌不得踰正月月中旬各省直撫按查明完  
兌與否俱以正月月中旬據實題報如兌運倘有  
未盡先將有司運官一併叅治仍令戴罪兌發  
領運候抵通日容臣甄別舉劾仰荷

聖明採納

特賜俯俞各省直撫按諸臣以是限督之有司皇皇  
乎惟恐弗及而有司以自限自惕凜凜焉惟恐  
逾期是以開幫無違而過淮過洪節節依限行  
之今歲業有成效似應著爲定規載入議單庶  
幾永遵無斁也一酌議截留以省剝運夫津門  
之有截留也以各幫之有帶運也每正糧十石  
帶運遼糧一石五斗以正糧三百石計之則每  
船不下四十五石矣且一船所載之正糧不止  
三百而帶運之數等而加之又不止此當年酌

議截留惟擇整幫或因其便於收受以免零星  
而且因重船之阻東派截尾船以速回空耳繇  
是各幫官旗垂涎於截津之便啓徘徊觀望之  
心船一抵津趨趨不進夤緣鑽刺科需滋擾邇  
者深鑑此弊或議坐截於過淮或議定派於抵  
津見之章疏不一而足無非爲杜絕奸弊之計  
耳然重艘旣抵務關官旗往往告剝則與其起  
剝於津門以北何如以各幫帶運之糧逐船截  
收之爲得乎一以代剝運之艱一以省水脚之

費一以杜旗軍觀望之端一以絕運弁科派之  
擾誠一舉而數善備焉一酌明事權以重責成  
夫南京衛弁原屬之部科管轄更番印運亦屬  
之部科定擬通計三十四衛分派四十六幫共  
該軍船一千六百餘隻一切僉旗造船督催赴  
次頭緒紛拏羣情傲慢其遲其速悉責成於應  
天府推官在推官奉行惟謹促之必嚴在軍衛  
視若贅疣急之反緩總之以不相統攝之官而  
欲使其稟承之速是以掣肘而難行也茲值漕

限至緊

功令至嚴而僉造督發豈容一日怠玩則推官事  
權不可不重也外衛諸弁賢否取之推官而推  
官因之加重提掇自靈京弁之賢否與推官無  
涉故催呼不應祇茲抗藐而運弁旗軍戀任私  
家遲速任意非所以重責成也臣愚謂以後行  
令應天府推官督責各衛掌印官嚴催官旗船  
隻限十一月以裏盡數差人押發水次領兌取  
水次收管類繳推官查覈開具各衛掌印官職

名分別遲速定擬等第呈送總漕巡漕具疏題  
報速者優叙遲者參革則人情振勵而督發無  
違矣一坐派水次以速兌運夫州縣糧米原有  
額徵之數軍衛船隻亦有額運之糧因州縣水  
次或有肥瘠而輪流派兌所以通下情也第一  
歲派一衛明歲又更一衛糧里謂此係新更之  
旗可得而欺瞞也一切盡會加增意且欲減少  
于數之中旗軍謂此係新派之次可得而需索  
也各項交兌糧耗意更欲增益於數之外彼此

爭論曠候時日赴次雖早而交兌亦遲甚矣輪  
更之誤也以江省言之每苦于楚省旗船之遲  
盍若定派某衛船若干隻領兌江糧在江省有  
司知有定派之幫船先期迎催以速兌在楚省  
弁卒知有定派之水次預期料理以赴運而較  
斛開兌年年循有舊規不待爭論其便爲何如  
也再將派定官旗行月糧銀申飭楚省有司不  
得徑給官旗勒限於十月以裏解交江省糧道  
查收候楚省弁卒到次支發而楚省弁卒又知

行月糧銀俱解江省戀住私家無益也如該年  
十月終楚省糧銀尚未解至許江西糧道具呈  
漕臣叅處他如浙江南直各衛所水次亦應定  
派而紛更可省鑽營可杜爭論可息兌運可蚤  
是在酌議以審處之耳等緣繇九月初二日奉  
聖旨該部酌議具覆欽此欽遵抄出到部送司查得  
坐派水次一欸向係總漕部院職掌隨即呈堂  
咨行查議去後迄今未准咨會前來但時日已  
久以難再緩相應酌覆案呈到部該臣等看得



年來漕運積弛致厯

皇上焦勞在事諸臣莫不各効一得以故頃洗宿弊  
創立新規凡有關漕運者亦幾無遺議矣今漕  
臣王邦柱在于目擊復以四事上

請如申明定限以速開幫責成推官以重事權洵漕  
政之要務從涉歷中拈出所當亟行遵照以共  
襄漕務者至于截留津糧先是崇禎二年該總  
漕臣李待問議定分幫輪派奉有

俞旨似可無煩紛更矣坐派水次原係總漕酌定今  
亦當屬之總漕但以楚船而兌江糧每苦遲悞  
若行月糧銀先期徵完交付江省糧道收貯支  
給則繫戀杜而赴次急亦所以速輪輓矣旣扼  
漕政之關鍵更酌漕事之因革亦惟求有利無  
弊耳謹列欸覆

請恭候

勅下臣部移文各該衙門一體欽遵施行

計開

一申明定限以速開幫該臣等看得糧艘開

幫一節原係喫緊關頭先該臣部條議省  
直漕糧俱限十二月兌完開幫責成撫按  
具疏奏

聞違一月者罰俸一年違二月者降職二級遵行在  
卷前漕臣王邦柱慮恐游移未免遲悞題  
請再爲申明令其確然遵守業經臣部覆奉

欽依今歲運事較之去年蚤竣兩月乃已見之成效  
也委應載入議單永著爲令

一酌議截留以省剝運臣等看得截留津米

因各幫有帶運者卽令逐船截取一以省  
剝運之艱一以省水脚之費漕臣之議良  
是但查津門截留漕糧每歲約五十萬有  
奇向因奸弁鑽營未免多生觀望先是崇  
禎二年總漕李待問條議有輪幫坐派之  
例業行一年後因虜變中止近經督臣錢  
春條議分幫輪派宜行一款業該臣部覆  
議仍聽總漕臣于十三總內每歲輪派兩  
總截留津門週而復始勞逸適均旣無營

求之費而虧折自少亦無逗遛之望而鼓  
棹直前計無便於此者若欲逐船截留恐  
萬艘雲集每艘俱停泊數日求速而得遲  
非計之得也總漕前議已奉

俞旨不必再爲更張矣

一酌明事權以重責成臣等看得司李之權  
在各府可行於衛弁而應天每苦於梗令  
以其不相統攝也南京各幫督催赴次旣  
已責成應天推官而各弁多以弁髦視之

何以展布四體漕臣謂必以押發領兌責  
其督催卽以優叙叅革聽其甄叙總漕巡  
漕據以具題在衛弁知有統屬自當奉行  
唯謹而推官知有專責亦且竭蹶而趨事  
矣

一坐派水次以速兌運臣等看得各幫水次  
有輪撥有坐撥在總漕自有成規似難執  
一而不變者然或因更換而遲悞或因新  
派而爭執求速得遲階之爲厲漕臣議令

度支奏言  
坐水次以定衆志苟非年遠弊滋誠不如  
仍舊貫之爲愈也又謂楚船赴江每見爲  
遲迎催赴運無可下手漕臣議欲預定幫  
次一切行月糧銀預解江省聽彼中糧道  
分給令官旗知銀已解發必到次始發支  
領總不能急公如家料亦且趨利如鶩將  
見官旗不催而至不疾而速矣仍定限十  
月以裡糧銀照數解發若後期者據實揭  
報漕臣察處則地方有司罔不徵解恐後  
矣

崇禎四年十二月二十三日具

題本月二十九日奉

聖旨漕規定限責成等事已有屢旨其行月糧銀轉  
解給發如或愆期反致藉口不必行欽此

覆監兌吳澧朴責運弁張應斗疏

題爲遵

旨具奏事雲南清史司案呈卷查本年七月初十日  
奉本部送戶科抄出湖廣巡按御史白士麟題  
爲懇恩俯察造船有無遲玩仰祈

聖明勅部分別功罪以服人心事內稱漕儲重務押  
運造船各有專責漢陽府通判魏應元避嫌離  
任其推官劉熙則續委代管之官也本官承人  
之乏又值漕政戒嚴之日凜凜

功令夙夜在公採木鳩匠委有勤勞至於工完登  
水俱在限期之內領運者則軍伴韓國佐等管  
押者則通判羅學伊至黃州則有推官歐起鳴  
至境外則有通判葉玉衡委押交割歷歷甚明  
本官督造之局已完自茲以往或前途遲速或  
押運先後於本官無涉也又據糧道副使劉永  
祚報稱楚省督造左沔江糧新船節次遵奉嚴  
催於正月初旬俱已報完陸續登水本道親臨  
武漢二廠查驗甚確止因各衛官於歲前率領  
旗甲在江西兌米來遲又因江省無官督押一  
任逗遛本道於三月初二日舟次儀真見零船  
未至復委通判羅學伊自儀真返棹溯江流直  
抵鱟魚嘴星夜催押各船至本月望後俱進閘  
矣此皆彼中押運之事又非造船者所得干與  
也漕院之糾緣糧道轉報稍後而入奏在先所  
以慎重漕儲之意而嚴爲督責俾任事者不敢  
弛其擔旣奉

明旨下部查議則本官勤勞可念又當分別功罪以

昭勸懲者也又查得沔陽衛指揮張應斗到次  
稍遲該江西省監兌衙門幾斃杖下旋至儀真  
報故矣此弁經手錢糧尚未交京誠恐旗稍人  
役乘機侵盜異日波累於楚并乞

勅下該部移文江西監兌糧儲各官將指揮張應斗  
原領錢糧責令本船旗稍人役查明交割庶免  
侵漁之弊等因七月初八日奉

聖旨據奏劉熙造船無悞王邦柱前參豈屬無據着  
該部核議具覆張應斗原領錢糧着行該省查明

交割本內監兌衙門幾斃杖下是何緣故着一併  
查來該部知道欽此該本司呈堂咨行該撫按將

張應斗原領錢糧并幾斃杖下緣故查奏一面  
該本部將推官劉熙議覆七月二十八日奉

聖旨劉熙依議罰俸半年羅學伊該撫按疏內但稱  
先押運在途不明開會否委造船隻殊屬含糊張  
應斗原領錢糧及幾斃杖下事情俱着嚴催查明  
速奏欽此又節呈堂咨催去後今於十月初四日  
奉本部送戶科抄出江西監兌主事吳澧題爲

明旨炳若日星人言誤相波及謹直寫兌運情形仰  
祈

聖鑒立賜處分事內稱臣於今年正月二十日有衛  
官藐法悞運一疏續於二月十五日有江省兌  
務已竣楚船復載遲悞一疏皆言楚弁之玩楚  
船之誤而江西撫按二臣亦會疏具言之總漕  
臣李待問巡漕臣王邦柱熟悉其狀會疏參造  
船官此耳目昭彰公論會同之案也今楚按臣  
據推官劉熙之詳自謂無悞然取其開報月日  
一一質之已明供一誤狀矣臣恭查

欽定議單應造船隻限十月終赴次受兌而去歲頒  
示之例限正月正完兌開幫屢奉

天語叮嚀振飭至畫一也若造船官劉熙所云正月  
三十日造完二月十九日批差管押此於議單  
明旨相違甚矣卽曰劉熙受事在後然楚中之官自  
當有任其咎者柰何冒稱無誤誠臣所未解也  
又據糧道劉永祚云江西無官督押一味逗遛  
此語益非矣夫武左沔陽二衛當兌米時強半



雇覓民船尚有不足數者臣與江省撫按糧道  
諸臣爲之設法協雇僉謂楚艘卽來復載耳及  
臣尾押出湖至鱗魚嘴楚艘猶不至乃遣承差  
李國堯星夜往湖廣催取臣二月十五日疏可  
覆按也越三月十三等日總漕差官馬繼援湖  
廣通判羅學伊臣差人李國堯始押新船陸續  
奔到儀真開口皆於鱗魚嘴交卸是楚之新船  
始終不到江西水次也江西之米旣先爲裝運  
於半途以俟則逗遛之故在江西乎抑在湖廣  
乎若沔陽衛指揮張應斗乃臣前疏所參藐法  
誤運者也此弁于正月二十三日始到水次臣  
以議單按之運官至十二月不到次者降職三  
級調衛差操又以臣所奉  
勅書按之軍衛有司船糧過限不到輕則懲治重則  
拏問叅奏且

明旨限正月中旬盡數開幫而應斗徑于終旬到次  
藐法誤運臣旣題疏叅矣豈有明正其罪而不  
加懲責之理然臣當日猶念旣疏叅候

旨可勿重懲僅薄責十板以申漕法此各衛官所共  
知也從此應斗較斛驗米覓雇船隻晝夜兼兌  
未嘗以恙聞也念三日到次念四日起兌初二  
日完兌開幫後以二月二十九日至儀真時亦  
未有恙也到儀真叅謁各衙門尋被巡漕臣戒  
責則其無恙益可見矣越三月初四日臣約糧  
道臣黃應秀踰候楚舟而身押江西南南京等衛  
先率渡淮於時張應斗未見始自稱其病詢之  
云平昔有蠱脹之疾因憂勞復發及臣自淮回  
至揚州舟遇道臣黃應秀乃知張應斗已歿道  
臣卽以伊子代父領運矣今按臣之疏云到次  
稍遲江西監兌衙門幾斃杖下是實知應斗之  
被杖在到次日也又曰旋至儀真報故夫應斗  
歿故之日臣記憶未真然的在三月月中旬相距  
到次時已五十日則幾斃杖下之云按臣明解  
其非是矣何爲漫加耶至於該衛錢糧尚未交  
京按臣恐旗稍人役乘機侵盜乞

勅該部移文江西監兌糧儲各官查明交割良爲遠

慮殊不知張應斗病困時一切錢糧已藉其子  
攝理及歿時道臣黃應秀卽以其子代父領運  
原無待交割者矣等因十月初二日奉

聖旨該部併將原疏看明來說不得互調徇欽此  
欽遵抄出到部送司卷查本年二月內該江西  
監兌主事吳澧題爲衛官藐法悞運乞

聖明乾斷風行以速漕務事內叅沔陽衛運官張應  
斗正月中旬尚未抵次武昌左衛運官張明錦  
隨幫千戶葛延到次旣遲缺船又多運糧把總

並不相聞廣信所千戶胡龍吟臨時逃運且舊  
船全燬新船未完至於督造官劉京亦難辭責  
緣緣二月二十七日奉

聖旨漕運無悞全在開兌如期乃張應斗屢檄不至  
旗船並稽本當提究姑着降二級戴罪領運張明  
錦等違期缺船念已開幫也着戴罪通俟運完奏  
奪胡龍吟臨運潛逃尤屬非法着李待問嚴提究  
擬湖廣運總暨督造劉京併議罰治具奏該部知  
道欽此三月內又該監兌主事吳澧題爲江省兌

務已竣楚弁復載遲悞再乞

聖明大奮乾斷以肅漕法以固

國計事內續參張應斗等於二月初三日之後馮陽衛民船十三艘武昌衛民船二十三艘留泊鱖魚嘴等處張應斗躬在此處候船張明錦已先迤回雇船葛延原係督造新船虛領錢糧不蚤鳩工及運事屆期復卸擔他人以致遲悞湖廣把總黃河泰職司總運不一查問遲悞誤事均應降級戴罪完糧日定奪緣繇三月十四日

奉

聖旨黃河泰張明錦等既誤漕期且着戴罪償還到

日奏奪該部知道欽此俱經呈堂通行總漕部院

併江西湖廣撫按各衙門逐一遵行在卷今於

閏十一月二十三日奉本部送准都察院咨開

據湖廣巡按御史白士麟呈稱會同湖廣巡撫

魏光緒看得武昌府通判羅學伊先果委造船

隻而後押運今既劣轉無容復議相應呈請達

部具呈到院合咨查照等因又於十二月十一

日准坐糧廳手本內查張應斗原領兌江西瑞  
州府高安縣崇禎三年分秋糧係應襲張家隆  
并隨幫百戶史邦紀鎮撫陳一龍代運未及抵  
棚隨幫二員素糧潛逃惟應襲張家隆見在共  
正兌漕糧二萬一百五十二石一斗八升坐撥  
京倉并截留剗糧除京倉無欠掛欠剗糧六千  
八百九十四石五斗一升五合八勺三抄一撮  
改兌米五千九百五十二石邊糧三千九百一  
十五石六斗二升坐撥通倉除收受外掛欠米

一千三百九十五石六斗二升七合等因爲照  
羅學伊先委造船情節併張應斗交糧數目俱  
經各該衙門查覆前來相應與御史白士麟主  
事吳澧各原疏一併看明具覆案呈到部該臣  
等看得造船押運俱關漕務今歲江右糧艘據  
報抵次開兌亦已如期無誤惟沔陽衛運官張  
應斗正月中旬尚未抵次武昌左衛運官張明  
錦隨幫千戶葛延到次旣遲缺船又多則違誤  
開兌實楚弁也監兌吳澧有衛官藐法誤運一

疏及登舟解纜各船無一留行獨沔陽衛民船  
十三船武昌左衛民船二十三艘留泊鱗魚嘴  
等處以待新船復載則遲遲不進實楚船也監  
兌吳澧又有江省兌務已竣一疏俱奉有

明旨 在案然此楚船誰實督造則漢陽府推官劉熙  
亦難辭其責矣特念其以續委代管之官復又  
完工於三月爲限之內此按臣白士麟以懇恩  
俯察造船有無遲玩一疏代請而臣部亦以罰  
俸半年改擬覆奉

欽依惟是張應斗之受責也委以抵次過限故耳乃  
受責于正月二十三抵次之日而其歿也乃在  
三月初旬開幫押運之時相距幾五十日則非  
杖斃明矣故按臣亦僅曰幾斃杖下云爾大都  
江楚相距道里旣遙楚船江運期會易愆造新  
舟而刻日領運本難卒辦因朴責而封域岐視  
未免猜疑其實監兌在漕催漕乃其職掌而按  
臣在楚憐楚亦出目擊所請

勅部移文查明交割惟恐此弁經手錢糧各役乘機

侵盜今監兌吳澧疏稱應斗病時已委其子張家隆攝理歿卽領運無待交割但據通廳開報應斗共欠津通糧八千二百九十餘石掛欠極多未必非以身亡貽禍則按臣所言固長慮也至于羅學伊先委造船後委押運其遲悞之愆法固難逭旣經劣轉不必再議臣等備簡二臣原疏及其情節原是如此謹據實以聞若互調偏徇義之所不敢出也伏候聖裁施行

崇禎四年十二月二十八日具

題崇禎五年正月二十日奉

聖旨運弁玩違勅內自有參奏一款吳澧擅行懲責且改捏勅語支詞抵飾好生可惡姑着降三級調外任用該部奉旨議覆何得如此徇庇該司官姑不究其張應斗所欠各糧會否追完還着奏明該衙門知道欽此

題漕糧積欠追比續完數目疏

題爲漕糧積欠數多漕事成規大壞懇乞

聖明嚴追比之限重考成之法懲前毖後以整飭新  
運事雲南清吏司案呈卷查崇禎二年八月內  
該本部題前事內請督飭省直立限追比漕糧  
積欠緣繇本月二十三日奉

聖旨漕糧京通邊津節年掛欠八十餘萬國儲民膏  
豈容奸弁吞噬爾部便咨會刑部總漕勒限省直  
撫按轉行道府緝拿逃欠官旗分別追比過限不



完的解送來京按侵盜律擬罪道府遵奉延緩撫  
按指名叅奏撫按回奏稽遲部科照考成例查叅  
各不得違玩其所價酌准舊例及運官扣俸查解  
依議飭行今後掛欠監比運官法司不行奏請私  
自召保該司官究處不宥該衙門知道欽此欽遵  
通行各該撫按衙門轉行道府設法追比去後  
查原疏內已經勒定限期凡欠三千石以上者  
每年先完一半限二年通完一千石上下者限  
一半通完及查省直原欠漕糧自萬曆四十七  
年起至天啓七年止通共八十萬九千四百六  
十六石二斗四升七合零至崇禎四年二月終  
旬時及一年有半僅完過一千九百六十餘石  
該本部遵例題催內稱姑念經追各官於前項  
欠數追貯見解未據開報倘卽槩行叅處恐無  
以服任事之心通限本年六月以內令各該撫  
按將前項完欠數目據實回

奏該本部於崇禎四年三月二十四日具題前因

二十九日奉

聖旨這積欠漕糧有旨嚴限考成今已踰歲應天山東等衛僅報完一千九百餘石其餘省直如何全無的報卽藉口年久各該官旗應有銀糧產業可以扣追何得徇玩如故着將所欠糧數通行該撫按嚴比還將完過若干起解若干併未完的作何區處俱限本年六月據實回奏如再違限該部科卽行叅處以信功令欽此復又咨催去後今于崇禎四年九月十五日奉本部送戶科抄出湖廣巡撫魏光緒題前事內據各道府呈報追抵過天啟元等年各弁羅僂等糧銀數目理合造冊奏繳緣繇九月十一日奉

聖旨該部知道欽此又于本年十一月二十一日奉本部送戶科抄出應天巡按御史饒京題前事內據各道府冊報追抵過天啓二等年運官林勝祖等糧銀數目緣繇十一月十八日奉

聖旨戶部查明具奏欽此抄出到部通送到司又本年十一月十六日奉本部送准都察院咨前事內開據江西巡按御史葉成章呈報追抵過天

啓四等年運官鄧林茂等糧銀數目合咨查照緣繇奉批雲南司查議明確聽候類題就中已解淮庫者多未解部淮上徑自那用開銷此不可不問也奉此隨即呈堂咨催總漕部院併江西撫按作速起解俱各遵奉在案爲照各弁所欠漕糧自萬曆四十七年起至天啓七年止共計八十萬九千四百六十六石有奇不爲不多矣該本部題催至再屢奉

明旨以追比責道府以叅奏責撫按立通完之限援

考成之例

功令不爲不嚴矣乃備查追補之數止應天龍江

左衛指揮陳弘道下抵完米九百石三斗六升

留守衛指揮李天培下抵完米五百五十石四

斗山東德州衛鎮撫周承胤下抵完米四百八

十石百戶郭榮勳下抵完米二十五石千戶吳

守良下抵完米十石本部先經具題外此外如

湖廣糧儲道右叅政袁一鳳冊報天啓二年分

武昌左衛千戶張振邦下補完米一百四十八

石九斗九升又追抵銀一百六兩一錢八分九釐四毫二絲天啓四年分武昌衛指揮羅岱下追抵銀一百七十五兩九錢二分武昌左衛指揮郭屏南下追抵銀九十九兩一錢一分襄陽衛指揮崔建勳下追抵銀四十一兩六錢五分四釐沔陽衛指揮邵希堯下追抵銀四百四十五兩二錢三分千戶張朝聘下追抵銀二百五十九兩天啓五年分武昌衛指揮周鎬下追抵銀九百四十七兩七分武昌左衛指揮陳以傑下追抵銀一百四十六兩七錢天啓六年分武昌衛指揮張遵祖下追抵銀九百六十三兩二錢武昌左衛指揮張洪濟下追抵銀二百九十兩沔陽衛指揮王鶴齡下追抵銀一千兩天啓七年分武昌衛指揮謝繼安下補完米三百五十六石九斗九升千戶密印捷下補完米一百二十九石五斗四升四合岳州衛指揮馬楊下補完米二千九十三石三斗五升一合以上共米二千七百二十八石八斗七升零銀四千四百

六十五兩零又直隸巡按御史饒京疏開天啓  
二年分太倉衛指揮林勝祖下補完米五百六  
十五石五斗零天啓四年分蘇州衛指揮李應  
實下追抵銀四百七十兩七錢三分指揮宋維  
城下追抵銀五百九十六兩天啓五年分太倉  
衛百戶王輿下補完米二百四十八石七斗一  
升零天啓六年分龍江右衛指揮陳弘道下扣  
完米一百八十八石九斗三升太倉衛指揮張  
元佐下補完米二千一百七石三斗又追抵銀

二百三十五兩二錢九分六釐蘇州衛指揮楊  
基下追抵銀五百八十二兩三錢六分指揮袁  
時隆下補完米一千六百七十九石一斗一升  
鎮海衛指揮陳善道下補完米一千八百餘石  
天啓七年分鎮海衛指揮李範賢下追抵米九  
百二十五石九斗以上共米七千五百一十五  
石四斗五升銀一千八百八十四兩三錢八分  
零又江西巡按御史葉成章開報天啓二年及  
天啓五年分九江衛指揮徐元奎下追抵銀三

百七十四兩三錢八分天啓四年分建昌所千  
戶鄧林茂下補完米一千五十二石四升七合  
天啓五年分吉安所指揮蕭光卿下追抵銀四  
百八十二兩八錢一分饒州所千戶丁奇勲下  
補完米三百七石九斗零又追抵銀四百六十  
兩三錢一釐天啓六年分建昌所千戶劉世臣  
下補完米九百九十七石五斗八升三合四勺  
饒州所指揮許治下補完米七百六十一石九  
江衛指揮陳光祖下補完米四十六石三斗五  
升八合二勺永新所千戶宋德隆下補完米一  
百石五斗天啓七年分九江衛鎮撫孫聖祚下  
追抵銀八十四兩鉛山所千戶李新下追抵銀  
一百二兩以上共米三千二百六十五石三斗  
八升零銀一千五百三兩四錢九分零又如浙  
江巡撫陸完學冊報運弁逋逃非法一疏內開  
天啓六年分杭州右衛指揮李根仙下追抵銀  
一千一百一十八兩四錢處州衛指揮曹濬下  
追抵銀二千四百二十五兩五錢五分温州衛

指揮甄翼龍下追抵銀四百二十五兩四分天  
啓七年分台州衛百戶郝應藩下扣抵米四百  
一十四石百戶賈天祚扣抵米二百六十四石  
以上共米六百七十八石銀三千九百六十八  
兩九錢九分其餘屢經移催未報然此不過據  
其冊報則有此數而于內未解者猶屬虛懸卽  
已解者亦未到部况未經開報者其數尚不貲  
乎猶未也夙逋尚未完報而新欠復又相仍如  
崇禎元年分南直隸共欠一十四萬二千八百

一十八石七斗九升零湖廣共欠四萬四千四  
百一十七石一斗九升五合零浙江共欠七萬  
六千七百七十四石八斗七升零江西共欠二  
萬一千七百二十石四斗三升零山東共欠六  
千六百三十七石八斗三升九合零崇禎二年  
分南直隸共欠二十七萬九千四百七十九石  
七斗二升三合零湖廣共欠四萬八千七百一  
十二石二斗八升七合零浙江共欠六萬七千  
五百二石二斗五合零江西共欠三萬一千二

百五十二石八斗七升九合零山東共欠一萬  
二千六百八十一石九斗七升八合零俱經本  
部截叅在案今查已經冊報與見經抵銷者在  
崇禎元年則有武昌寧波等衛指揮等官殿尚  
爛等完過銀七百四十八兩四錢七分米一千  
二百一十三石八斗七升在崇禎二年則有南  
昌寧波等衛指揮等官劉嘉爵等抵完過米九  
千一百八十一石八斗其餘猶然未完也統計  
追補未及其半而兩年通完之限業已逾期新  
欠相仍之數積累更多軍糧關係如此之重而  
地方奉法如此之緩所當亟請  
明旨併加嚴督以清積逋以裕

國儲案呈到部該臣等看得羽林十萬之衆計日  
待哺惟

國儲充盈是依惟省直漕糧是賴也向以積欠數  
多臣部屢請催督致厯

聖明切責經營諸臣自宜依限通完如期回  
奏乃今閱二年所矣時逾通完之限而湖廣應大



江西浙江猶俱完未及額山東浙江鳳陽尚未  
奏報雖徵解日繁用一未免緩二而官旗有限急  
新又復延舊

功令炳於日星臣部憂切攢眉雖難完而不完不  
得不爲諸臣原情然過限而不報又何敢爲諸  
臣泄視也伏乞

皇上再加嚴飭在已經

奏報者速將追完銀米盡數起解聽臣部查銷其  
米卽抵帶買遼糧以便轉輸若未完銀米屬未

經

奏報者定限次年四月內照數通完作速解部方  
准銷筭倘再踰限不完各該撫按仍將經管道  
府具奏處分而撫按回

奏踰期臣部亦執考成之法以議其後固有所不  
暇計矣至崇禎元二兩年比追掛欠奉有

明旨按期

奏報

天語煌煌亦豈容少有隕越也者良以新欠夙逋總

國儲不得彼此岐觀尤望

皇上一併重加催督者也既經該司案呈前來相應  
題

請恭候

勅下臣部移文各該衙門一體欽遵施行

崇禎四年十二月二十九日具

題崇禎五年正月初四日奉

聖旨漕糧積欠勒限通完乃報追僅十之一尙未解

部且有未經奏報者該管官玩肆殊甚爾部卽當  
查明叅處何得但請嚴飭還着行各該撫按通查  
經管道府職名及完欠確數若干詳開奏奪仍一  
面將已追的速催起解未完未報併新欠的都着  
依限嚴督追補如撫按徇庇延飾該部科一體叅  
來重治欽此



